

鈴

山

堂

集

鈴山堂集卷第三十四目錄

神道碑

明故光祿大夫柱國少保兼太子太保吏部尚書護身殿大學士贈太保謚文簡毛公神道碑

明故光祿大夫柱國少保兼太子太保禮部尚書武英殿大學士贈太保謚文靖賈公神道碑

光祿大夫柱國少保兼太子太傅禮部尚書武英殿大學士贈太保謚文康顧公神道碑

大學士石門先生翟公神道碑

榮祿大夫太子太保禮部尚書兼東閣大學士
贈少保謚文簡張公神道碑

光祿大夫柱國少傅兼太子太傅吏部尚書文
淵閣大學士贈少師謚文簡許公神道碑

山堂集卷第三十四

神道碑

明故光祿大夫柱國少保兼太子太保吏部尚書謹身殿大學士贈太保謚文簡毛公神道碑

東海之上岱岳之墟融結郁勃含靈毓粹乃生元臣以佐大君惟東萊毛公蜚聲臺閣定策中興祿位嚴崇名壽鴻顯其在孝廟擢穎詞垣簡侍東觀羽翼啓導蔚然公望其在武廟歷踐省署荐履台衡正色直言匡扶鼎社今上皇帝神聖明睿褒隆勲德

宸章備其揄獎大賚焯於始終二十四年乙巳六月六日以疾薨于里第之正寢享年八十有三訃聞

天子震悼恩卹隆備廼有仲子太僕卿渠纍然在疚遣使託嵩銘諸墓道公姓毛氏諱紀字維之世爲東萊掖人曾祖伯全祖福英隱弗仕父敏舉鄉薦教授杭郡學俱贈光祿大夫柱國少保兼太子太保戶部尚書武英殿大學士妣俱贈一品夫人公幼則侍父于杭篤志力學弱冠舉丙午山東鄉試第一丁未第進士入翰林讀中秘書授檢討同考丙辰會試陞修撰充經筵講官選侍東宮講讀賜五品服修大明會

典書成陞侍讀賜給驛歸省再同考乙丑會試

武

廟即位進左春坊諭德兼侍講賜金帶丁父艱服闋
值逆瑾竊政削其春坊銜孝廟實錄成陞侍講學

士充日講官尋陞學士擢戶部右侍郎禮部左侍郎
丁母艱服闋改吏部左侍郎陞禮部尚書掌詹事府
事賜玉帶時遣使西域齎番供公奏言西番佛國遠
在數萬里外祖宗朝雖許入貢賜法王國師名號
特藉以羈縻番眾令不爲邊患而已齎供媚之失天
朝體又以儲嗣未建疏乞早定大計以學士司誥勅
仍掌府事賜麒麟服蟒衣緣環繫帶等物於是勅兼

東閣大學士入閣供事隨加太子太保文淵閣大學士賜蟒衣斗牛服錢寧等數導上巡幸會逆濠之亂倡親征議上御文華殿宣內閣九卿科道官於左順門傳旨促令撰親征詔公等力言不可免冠伏地泣諸司皆泣上諭各官退復降手勅欲出師自稱威武之號公奏言人君爲天下主不宜自貶下同臣庶上意稍悟三載考滿加少保武英殿大學士車駕幸宣大駐蹕居庸公力疏請還未幾卒以征濠議南幸公等奉勅居守憂勤備至懇請回鑾章數十上武皇晏駕公等密疏請于昭聖皇太后決集

奉迎。今聖天子入承大統，于時逆彬統京營、遼軍及錦衣官校威焰特盛，禍機叵測。復密請懿旨，先擒彬黨，令邊軍官校各散歸中外，始安。皇上入登大寶，開經筵，勅同知經筵事纂修。武宗實錄命充總裁，累賜蟒衣、玉帶、銀幣。上念定策功，勅封公等伯爵，疏辭改廕錦衣一職。世襲又改廕文職五品。上引前代漢文加封平勃等功及我成祖封尚書茹瑞故事，俾勉承恩。命天語懇至，皆力辭免。六載考滿，改吏部尚書，謹身殿大學士。上召公等至平臺議廟號，稱謂衆久不決。公以疾面陳乞退。上知其志。

決䟽入乃允致仕命有司給月米夫役陞辭賜白金綵幣寶鈔公既歸臺陳累䟽奏請起用山東撫按官奏公年登八十詔賜羊酒存問仍加給夫米等數甲辰太僕君以公年高乞假歸省上特許之居無何而公計至矣距生天順癸未七月十有七日享年八十有三配官氏累封一品夫人前卒子男六長蔡順天府推官次槩戶部員外郎次槩和州知州次渠太僕寺卿次業次集左府經歷女二長適按察檢校劉朝次思南知府李光祚孫男十一人延照延魁延厚延慧延清延年延玖延祀延太延康延慶曾孫男三

人公器宇凝重燕居無褻容素不言人過不妄交際
士夫至萊者必造其廬第以刺答之而已平居手不
釋卷老而愈篤作文渾厚典實一根於理所著有鰲
峯類稿密勿稿辭榮錄聯句私抄歸田雜識藏於家
嗚呼公位極人臣年躋上壽諸子接武仕籍豈天獨
厚之耶抑公盛德承休而百順自鍾焉耳夫仰述前
修用章國紀以鑒示將來史臣職也後學者之責也
嵩乃爲銘曰

世履承平優游廟堂謹守畫一中智可當比時艱屯
鮮不仆僵猗嗟毛公社稷之望養德初筮循性中行

講幄進規直言琅琅逆既恣睢不柔不剛隨事周旋
與道弛張佛供有表儲建有章蹇蹇謬謬爲龍爲光
台輔旣陟群孽方猖駕言親征以逞民殃公諫不止
爰持其綱居守兢兢六典有常庶幾弗墜以勛以劬
辛巳之變群心惶惶密勿決策奉堯于唐大明御天
群陰伏藏功成不居鴻飛冥翔大耋踰壽綠野徜徉
厭世長歸白雲之鄉東海之濱松檟蒼蒼有鬱佳城
公魄永康

明故光祿大夫柱國少保兼太子太保禮部尚
書武英殿大學士贈太保謚文靖賈公神道

碑

今上皇帝入嗣大統曠咨元僚興致化理維時少保
大學士賈公以宿學重望簡致左右數召見諮問平
臺讌對親灑宸翰賜詩褒諭公年六十四以老請詔
給驛以歸歸二十年癸卯之冬公年八十河南守臣
以聞詔遣官存問加月廩歲夫又四年丁未之秋公
以疾終訃聞詔贈公太保賜謚文靖賜祭營葬如例
上之所以優禮元老大臣者恩禮始終而公可不
謂希世之遇哉公之嗣孫中書舍人暉以墓道之文
爲請昔在弘治乙丑公同考禮闈蒞實蒙選錄旣官

詞林歷監部暨入內閣皆公所踐歷之地典刑在望
風槩如存樹石勒文以表諸神道非嵩則誰宜爲謹
按公諱詠字鳴和河南臨潁縣人也初舉弘治己酉
河南鄉試第一丙辰登進士改翰林庶吉士授編修
充經筵講官公儀觀秀偉長身玉立識者知爲公輔
之器以忤逆瑾改爲兵部主事稍遷禮部祠祭員外
郎瑾誅還公編修尋遷左春坊中允兼修撰轉侍讀
學士掌南京翰林院拜南京國子祭酒故事諫官御
史有關選國子博士等官充之一而南監無不得選公
疏以南北一體宜稍采擢以勵有志詔可爲南祭酒

二年轉北祭酒而父樂菴翁年九十有五公便道歸
壽其親于潁上潁人榮之遂留潁擬草䟽終養而父
以疾卒服除會上登極擢爲禮部左侍郎奉命詣
承天恭上皇考獻皇帝尊號賜白金文綺改吏部
左侍郎尋兼學士掌詹事府事專管誥勅纂修武廟
實錄克副總裁官居數月晉禮部尚書兼文淵閣大
學士叅預機務實錄成加太子太保武英殿大學士
尚書如故復修獻皇帝實錄成加少保光祿大夫
柱國屢被鞍馬金幣寶鏤襲衣玉帶麟蟒飛魚之賜
公在內閣端嚴持大體然數抑貴倖如奏止中侍奪

牧馬草場不得與貧民爭利勲貴請荊州莊田復奏
罷之皆以公有古大臣風然當是時方更化與治士
皆喜趨事功好紛革而公更醇德雅度挈綱經元納
之太和不爲聲聞其所匡維調護甚多人不及知也
要其悃惓誠厚卓然稱鉅人長者而落落不苟台在
位二年竟謝去雖不究厥施而脫屣榮名田野詠謌
有洛社之風焉公性狀介初在翰林惟扃門讀書不
從同舍宴游爲文章醇樸暢達無艱深險僻之語嘗
同考會試主應天鄉試及武舉試各一又主考會試
凡程文一出天下誦之所取士徧列中外至今稱得

人雖老猶著作不倦耳目益聰明四方求文者踵至
揮毫運思酬答如平時居鄉抑畏真坦若未嘗居顯
官者歲遇三節必朝服躬詣縣庭行禮旦起入家廟
焚香再拜薦饗必慎立義田義塚以仁其族先世遺
產盡讓其諸兄可謂篤行君子者矣公生天順甲申
十一月六日卒以嘉靖丁未八月三十日享年八十
有四曾祖諱景山元季行省叅政祖諱彬考諱瑛三
世皆贈如公之官妣皆贈一品夫人元配張氏累封
一品夫人繼室趙氏公初有子曰葵曰萱蔭補國子
生皆殤今以從子芳爲後芳子昭蔭授中書舍人女

五長適舉人王儒次周府奉祀梁汀次李森次王庭
次谷衮孫女三長適趙中次陳二典次皆芳出曾孫
男二鑰曄之子以公歿後廕爲中書舍人至是芳等
以其年月日葬公勅修董村之阡蒿乃掩涕而爲公
銘銘曰

維賈之先肇迹膠東天祐聿起世績成功桓桓行省
始徙潁中篤祐流慶以待於公維公挺生河洛之秀
神明內蘊淵潁天授發解鄉闈蜚英文囿晚膺爰立
機政是司洵美且仁麟儀鳳師如何勇退曰惟止足
身退名完不可以祿亦旣歸止貝茨之陽綠野平泉

樂壽且康進作舟霖退爲綺皓自天祐之福履壽考
公神不昧上返列星遡瞻元德慨想儀形後有考者
視此刻銘

明故光祿大夫柱國少保兼太子太傅禮部尚
書武英殿大學士贈太保謚文康顧公神道
碑

國家設科取士得人爲盛然登廷魁至宰輔者凡七
人若文康顧公其一也聞諸故老言孝宗敬皇帝
乙丑試士日於宮中焚香祝天願得真才是年得顧
公爲進士第一公儀狀瓌奇風格峻偉觀者謂爲公

輔器公諱鼎臣字九和蘇之崑山人也授翰林修撰
未幾孝廟上賓以修實錄成陞侍講再轉春坊諭
德歷十餘歲今上即位首被知遇簡侍經筵日講
進學士上懋崇聖學日親儒臣討論經史公因進
講宋儒范浚心箴敷陳剴切上注聽嘉悅諭輔臣
曰鼎臣解說心箴朕思味其意甚爲正心之助上
廼親灑宸翰自註釋心箴又註視聽言動四箴及製
敬一箴勅翰林院國子監及天下學校建亭立碑鐫
刻五箴以示學者寔公之講心箴啓之也上又曰
洪範一書於帝王爲治之大經大法實爲親切今

臣分段計日從容論說必使盡其所言以爲務學求
治之助復慮詞訓繁多命公撰次節畧以進舊例每
寒月免講 上以洪範未終篇乃不輟講詔免公常
叅專直講讀 上奉先聖先師位祀于文華殿東室
而數御西室召公等十臣令敷奏經義公撰中庸首
章講義以進推言人君致治期臻聖神功化之極不
可安于小康 上稱善 上於西苑作無逸殿成命
輔臣及公坐講周書無逸篇陞詹事府詹事仍兼學
士賜一品金織仙鶴衣 上親耕籍田特命與九推
廷臣莫不動色悚嘆謂 上寵異儒臣如此自是晉

吏部侍郎拜禮部尚書但掌詹府事兩被旨教庶吉士于翰林故事用官二員獨受簡命自公始也公雖職在文翰數奉召對預密議簡在聖心既久執政有不樂公者數沮其進用戊戌八月始勅公以太子太保尚書兼文淵閣大學士入贊機務眷遇彌隆被賜宸翰經籍銀幣玉帶麟蟒飛魚之服多不可悉紀己亥二月加少保兼太子太傅進武英殿大學士車駕將幸承天勅公居守京師公條奏軍國重計七事上悉從其請賜印記一其文曰經緯首選上曰卿謙懷舊臣久懷經濟朕茲重寄宜欽承之

公輔

皇儲持挈綱維京師肅然然以馭下過嚴

致有煩言再疏乞休荷溫旨慰留明年感疾久不瘥

上屢遣中官齎手札賜問以太醫往視賜藥劑牲

米諸物疾革陳遣疏勸上親賢圖治願養聖躬詞

誠懇篤降詔褒答而公竟卒庚子月日也享年

六十有八計聞上軫悼賜祭葬如制贈太保謚文

康遣行人護喪還公傑特有大志留心經世隨事獻

納多見采用嘗請訪求曾子之後以奉其祀大同軍

變請誅止渠魁以安人心四方郡縣多奏水災疏陳

生民困窮之狀請遣使賑卹而公生東南見財賦

日蠹民力日屈則三舉奏焉晚歲履政府將大有爲
然僅二載卒于位時論惜之云曾祖諱大本祖諱良
考諱恂三世皆累贈如公官妣皆一品夫人配朱氏
累封一品夫人四子長履方舉鄉薦履祥履貞履言
孫男四人謙亨尚寶司丞次謙益餘二尚幼曾孫男
五咸和咸平咸康餘皆幼履方等以 年 月

日癸公于震澤潭山之原未幾履方亦卒於是謙亨
以神道之文來請於予予舉進士附公榜末同館閣
幾三十年同時儕輩凋謝殆盡嗚呼予豈忍遂銘公
之墓耶蓋予嘗感於君臣之際矣明王非得賢無以

弘其德喆士非遇君無以顯其功洪惟 皇上天縱
聖資緝熙帝學而公以名儒職勸講啓沃之功懋焉
淵衷孚契始終褒榮君臣相遇於是爲盛則予豈
得不銘公之墓耶銘曰

嶽彼潭山震澤之潏孰崇其封顧公之墓公起倫魁
躋位丞輔嘉靖初載 聖學日新便殿時御列侍儒
紳公執經史婉切敷陳 帝聞而嘉賜札褒美曰茲
正心庶助予理寒寒顧公可屬大事遂典機衡以相
天子摠誠納誨陳力宣猷如室作棟如川作舟
孝皇之遺視古豐芑逮事 今聖允諧魚水虎闥講

藝宣室論思公所遭逢千載一時士生于時莫難遇
主矧惟神聖豈倖可致叙列初終以告來世

大學士石門先生程公神道碑

故少傅兼太子太傅禮部尚書謹身殿大學士程公
以嘉靖丙午月日卒于家明年月日公子
進士汝儉汝孝錦衣千戶汝敬等奉柩葬于都城崇
文門外樓子莊祖塋之次而屬高書諸神道之石公
諱鑾仲鳴其字學者稱爲石門先生其先山東諸城
人也曾祖諱吉勝起人材而隸勲衛祖諱順因扈蹕
而積勩勤考諱瑄義重神都名高閭左三世隱德歟

公貴皆推贈如公之官妣皆一品夫人公資體凝
肅若山立問學成於迅昂素履安於隱約屬弘治乙
丑策士特占上第拔處木天陪遊虎觀正德間逆豎
竊柄一時文館雋流多被斥逐公由編修改司寇屬
已而光復舊物荐升華貫校文彰得士之休修史得
纂言之體公素明經術選侍講幄莊粹著於儀容清
暢發於音吐聖心簡在重瞳屢回遂由侍讀拜翰
林學士尋陟少宗伯宸眷荐隆金甌卜相霖雨需賢
擢吏侍兼翰學入內閣預機政于時館寮咸有爰立
之望而公獨膺特達之知既進大宗伯兼文淵閣大

學士位列公槐文叅視草平臺召對後死命遊膺喜
起之歌沐蕃庶之錫至銀文圖書之賜有清謹學士
之稱屬以內難解官持服雖三年不過君命而九重
每注 皇情比及大駕南巡即家拜命授鉞行邊西
涉河湟北踰代朔碣石崑崙崙輶車遍歷燕然瀚海
戰遙臨方同尚父之鷹揚旋屬召公之篤棗還闕拜
恩勅公仍以太子少保禮部尚書兼武英殿大學士
入閣辦事天顏密勿造膝日勤聖眷優隆論思時切
是歲壬寅 上念公勤勞加光祿大夫封國少傅兼
太子太傅公自正德丁卯授秩詞垣惟守制數年暫

居家食餘皆班聯仙選職典台司仕四十年官從一品寶翰奎文屢承天藻金幣蟒玉疊資秘箴寵遇之盛茂以加矣甲辰解政歸第方怡水月於平泉丙午寢疾夢楹竟躡星辰於箕尾距生丁酉享壽七旬同志倍傷朝紳咸悼嵩也蚤依瓊樹同沾賜第之榮晚附青雲叨陪樞席之末顧薤露其先晞奄木稼而遽作典刑徒遠風範攸存爰勒貞珉爲紀豐德樹之墓道俾詔來禩云銘曰

翟起有家青海之隅爰從豪右內徙神都星精示兆嶽降應符惟公挺生聿起文儒學海濔濔文鋒迅驅

蚤陪庠列荐陟榮途鵬運滄澥鳳鳴高梧帝簡良
弼召贊訐謨爰躋鼎鉉遂執衡樞精白彌勵勤誠弗
渝奄忽何之哲人云徂長川東逝落景西晡仡仡高
墳都城之郭勒詞考德永示弗誣

明故榮祿大夫太子太保禮部尚書兼東閣大
學士贈少保謚文簡張公神道碑

嘉靖乙巳八月十九日太子太保禮部尚書東閣大
學士南郡張公卒于位訃聞上深軫悼命禮卿諭
祭工曹營葬遣行人護喪歸其鄉贈少保賜謚文簡
嗚呼公可謂始終榮遇者矣公疾革遺言吏部侍郎

龍湖張公爲狀少傳許公爲銘而屬書諸神道之
石嵩於公有省閣寮案之誼有鏃礪括羽之益其奚
可辭諸按狀公諱璧字崇象世家南郡石首曾大父
必順大父子言舉天順庚辰進士歷官廣西按察僉
事父維舉鄉薦歷官山西叅政俱累贈如公官曾大
母王氏大母呂氏母王氏俱累贈夫人公蚤擢省闈
屢試南宮不利則益肆力問學晝夜探索僑寓京邸
起居服食人所不堪時學士劉五清汪石潭有聲詞
垣公皆師友切磨二公每語人曰是當鳴世才也辛
未舉進士選翰林庶吉士授編修文望益起甲戌乾

清宮災公上修德勤政講學三事壬午 今上龍飛
首開經筵公與進講器貌端肅儀矩偉然敷陳古訓
明幽剴切時司寇林見素以事待罪公講君使臣以
禮有耆德舊臣當加敬禮之語 上爲之改容乙酉
被命以宮諭出典南畿文衡一時髦俊多在甄錄戊
子丁大叅公憂卹典加厚命給驛還初公之入翰林
也大叅翁時宦山西因入賀萬壽即請政歸田公每
圖歸省翁遣書止之曰勉事職勿以吾爲念故公雍
容館閣歷清華纂御文司綸誥主考禮闈勞績懋
焉庚子南京大宗伯員缺詔下廷推至再凡得四人

以請 上特授公公廉謹自持於凡宿弊剪除而振
飭之癸卯召還北部適議建 太廟群論紛紜公酌
議以對制遂定欽天太醫監院率多冗員順天鄉舉
舊多冒籍公奏覈去五十餘人宿弊一清會內閣缺
員公與河南許公一時並用人望翕然頃之公病瘡
不能視事 上遣御醫診視中使齋賜粥米牲豚諸
物存問疾竟弗已卒于宣武里第享齡七十有一惟
公荆衡標望秉迪舊耆德性醇厚器宇凝重恂恂與
物無競天下稱爲長者而期其大用以弼成休養惇
大之治而溘然以逝士論惜焉自講筵迄於拜相其

間白金文綺銀瓢錦衣及經籍之賜多弗可悉紀累
荷遣祭分獻代拜陪祀之命而賜見 皇太子於臨
保室尤爲異典云元配黎氏繼配黎氏俱先卒贈夫
人今配趙氏公卒後具疏 上請亦得給封夫人公
初有子天麟廕補國子生年二十八卒公哀痛殊切
乃以弟瑤之子天鷄爲嗣又以族子天與之子世胤
爲天麟嗣仍奏補廕女四長適太學生素本初次適
濮州知州李炯次適叅將馬金子呈圖次適知縣劉
橋子承嗣公既歸將以 年 月 日與黎夫
人合窆于邑南之馬鞍山予旣論次其世及最公德

美之繁且大者而復系之以銘其詞曰

巖巖衡嶽旣巍其巔雄鎮南紀峻極于天大江來荆
洛秀炳靈流匯環峙人傑蔚興文定台鼎文僖宗伯
功業比隆後先有赫倬哉張公學本家傳沈酣經籍
文望蔚宣粵在太史衍衍雍雍秉筆不阿獻納惟忠
聖明御極首重講幄公叅其間格心啓沃甄才南
畿程別罔遺驪彩蕪收天馬呈奇旋掌邦禮公位荐
起聿新政教振飭綱紀兩都荐歷績用有成綸章特
下再擢台衡公居台衡靖共爾職亦曷從容小心翼
翼帝眷孔殷忽頽梁木天子震悼卹典攸篤於

維張公揭德振芳遠紹前躅躋于廟堂重厚淵弘不見其涖彼謨謨者疇能與似文國士里維公之原豐碑勒銘過者式焉

光祿大夫柱國少傅兼太子太傅吏部尚書文淵閣大學士贈少師謚文簡許公神道碑

嘉靖戊申七月二十五日前少傅大學士許公卒于家先是乙巳冬公遘疾乞骸骨甚切上慰留亦甚切乃連疏懇辭上不悅曰少傅輕去朕耶其奪秩令歸公行而病增劇既還里復延三載竟用舊患起又四載嗣子俱起復來京師乃始上疏告訃叙公

歸顛末。上嗟悼曰：少傅果非負朕者。乃悉復公
官，仍贈少師，賜祭葬，謚文簡。恩禮備厚。蓋至是而公
不獲已之情。皇上眷不忍釋之意，益章章焉。乃與
則請予書諸墓道之石。予與公同在秘閣交誼最深，
胡可以辭。公諱讚，字廷美，河南靈寶人也。先世曰威
者，仕元為兵馬元帥。西征過靈寶，愛其土風，家焉。八
傳至教諭聚生太子少保、吏部尚書，謚襄毅。曰進襄
毅，娶於張，繼娶於高。生公性警悟，博學弘治乙卯以
戴禮魁於鄉。明年登進士，授大名府推官。召為監察
御史。襄毅位冢宰，公例當避臺秩，廼改翰林編修。時

逆瑾擅政怒襄毅不已附証以他事矯詔罷之而
並出公為臨淄知縣丁襄毅憂服闋陞浙江按察僉
事陞副使理海道改山西督學政至則先德行而後
文藝士習丕變歷陞四川叅政按察使浙江左右布
政使召為光祿卿轉刑部侍郎拜尚書是歲議郊禮
分合公上疏曰分祀者致嚴辨之道也合祀者通功
用之妙也昭格天地不在禮文而在淵德請慎茲大
典先是揚州商素英者武廟南狩錦衣指揮施恭
怙權璫勢矯詔藉其家至是英妻訴聞屬公訊理
權者日偵伺鼓譟為挾持計公不為動竟寘恭重典

當是時後有薛侃迎親藩之議詹啓訃銓部之言
張紳之薦劾朝紳劉永昌之誣詆省閣皆事關國紀
運及大寮其衆諸司恐懼失措公從容裁決持法甚
平務存大體上悉從之而縉紳賴以安改戶部尚
書河南軍餉舊允於大名府小灘有奏改他鎮者公
曰利不百不變法乃今增役創署勞費且十倍勿改
便又有議今有司積穀備荒以多寡為殿最者公曰
預備既有倉今舍此而別積穀徒增苛歛勿從便兵
部議與甘肅屯田發銀三十萬兩公曰兵弱虜強士
不得耕徒損國儲非計凡所規措務循舊則數報罷

新議曰母徒徇名貽害也以鹽法久滯疏陳諸弊列
通商事宜皆經久可行聞高太夫人病疏乞終養不
允令給驛歸省高卒哀毀踰禮時吏部缺尚書廷推
數人上皆不許詔特起公俟服闋蒞事既至乃首
疏決壅滯公薦舉復久任停無故改調之途抑奔競
濫陞之習上皆嘉納六載考績加太子太保己亥
冊天禮成加少保扈從聖駕南巡疏節程途以保
聖躬上褒答勞錫之辛丑廟災引咎乞罷詞
甚切詔許致仕給驛歸上雖從公請而意不釋
吏部復缺尚書廷推數人又不許仍起公蒞事至則

條奏諸弊政及上安邊方略數千言以一品公載考
績加太子太傅尋命兼文淵閣大學士入閣辦事乙
巳太廟成加少傅無何疾作乞休遂有賜歸之命
歸出賜金通惠鄉族曰吾不忍自私也又助修孔廟
山川壇歲旦暨聖節必扶掖北嚮稽首祝賀不少
廢疾革則謂諸子弟曰吾父子兄弟俱列上卿吾以
涼德受主上寵甚渥知甚深故數履危機卒賴保
全今已矣爾輩有官守者當思圖報遂卒距生成化
癸巳七月四日得年七十有六公歷官五十餘年晚
荷隆遇九大典禮多遣命將事其錫予飛魚之服銀

瓢彩帶及白金綺幣不可勝紀公兄弟八人兄誥南
戶部尚書弟論兵部侍郎餘並登仕籍配李氏累贈
一品夫人先卒夫人生子二長備早卒次即與承蔭
歷官知府未任改禮部員外郎以四品服辦中書舍
人事女三婿都指揮張蘆臣監生張良士舉人王陽
孫男二茂祿茂禎公德性溫粹意氣凝定坦夷康樂
而涇渭不淆直率徑盡而應變無窮蒞官翼翼小心
以不欺不怠為主在吏部前後凡十年每銓注必論
才高下與地繁簡兼風土南北而劑量之數諸司公
而恕或疵以田故飛語悉置不行以是人德之好著

述老而不倦所著有松皋集續集讀史詩論五經臆
說三曹奏議若干卷嗚呼公之德澤在四方勲績在
省閤孝友在家庭懿行不可殫述乃予特撮其大者
云爾銘曰

嵩華之間河洛濱桃林葱鬱佳氣屯元戎卜宇貽厥
孫有來八葉開祥源名世者出勲業掀纓紱軒駟輝
盈門公尤行業軼弟昆粹姿雅韻同璵璠銓衡繼秉
譽望尊遂參鈞軸入台垣聽言藹若春風溫譚議勃
發洪河奔豐功偉績銘彝敦上書謝病卧丘樊抱忠
耿耿歸幽窀上聞悼卹恩禮繁心事皦皦如朝暾

浩然正氣還乾坤直騎箕尾謁帝閭扶翊邦國保
元元神之下上公猶存

望山堂集卷第三十四終

鈴山堂集卷第三十五目錄

神道碑

明故吏部尚書致仕贈太子太保謚文莊羅公

神道碑

明故資政大夫戶部尚書兼翰林院學士贈太

子太保謚文敏李公神道碑

明故資善大夫太子賓客南京兵部尚書贈太

子太保謚文定張公神道碑

明故通議大夫詹事府詹事兼翰林院學士贈

禮部右侍郎謚文裕陸公神道碑

光祿大夫太子太保吏部尚書贈少保諡文襄

唐公神道碑

鈴山堂集卷第三十五

神道碑

明故吏部尚書致仕贈太子太保謚文莊羅公

神道碑

有明宿德碩儒曰太宰整菴先生羅公以嘉靖丁未
四月二十四日卒年八十有三初公致仕天子特
給月廩歲隸以示優禮既登八袞詔遣守臣奉牢
醴及門存問仍加賜廩隸至是計聞詔賜諭祭命
有司營葬贈太子太保謚曰文莊蓋褒賢崇德之殊
數也君子謂惟公實克稱之公風格峻整雅操貞肅

進則崇節振邁而毗於國退則遵養純固而範於鄉
談道著論則言爲代之師反躬實踐則行爲物之軌
好學不倦不知其衰耄之將至者耳公諱欽順字允
升言之泰和人少即端重殊異年十四題其門有勉
勉於仁義之語舉弘治壬子江西鄉薦第一明年入
奉廷對賜進士及第授翰林編修每朝退即閉戶讀
書不事交謁已疑然有公輔之望擢南京國子司業
正容端則六館以肅蘭溪章公懋爲祭酒深見信重
事多咨公而行以父栗齋翁年高得請奉歸留侍久
之不忍去因䟽乞終養而逆瑾怒奪職爲民瑾誅復

職由南京太常少卿陞南京吏部右侍郎改吏部右侍郎今上即位轉左侍郎前後連攝部篆甄別人才咸極精當時論稱重充實錄副總裁是時栗翁年益高公歸養之志益切拜南京吏部尚書抵任即馳疏乞休便養詔允之既而召改禮部尚書未行丁栗翁憂服闋仍以禮部起公未至復改吏部而公具疏懇辭於是得旨致仕蓋公審時直已不苟慕榮利如此自是江右部使兩都臺諫章數十上無識不識罔不冀幸其復出乃公則屏居却掃惟研精聖業窮探理性患近時學者持論高虛不屑古訓簡約是趨其

流之弊將墮入虛誕作困知記若干卷其言議精微
衍奧根極理要辯禪悟之學近理似是而斥其毫釐
千里之繆時習波頽我孺無易於戲道之不明智巧
橫出古之聖哲罔不戒慎省察率諸終身而不足今
之論者以謂圓明朝徹取諸一言而有餘其學術異
同世之君子必有能辯之者考公平生自史館以歷
國學則士行雍規由以丕變由奉常而陟少宰則官
常國是倚之取平中更什抑秉志弗渝榮進屢辭去
就惟潔然公雖蚤退而考論政務之得失究心生民
之休戚固未嘗一日不以天下爲念也每平日正衣

冠升學古樓群從入叙揖畢端坐觀書雖獨處無惰
容食恒二簋服無侈麗居無臺榭集無聲樂宗戚
率之而興於孝敬鄉閭則之而化於禮讓子姓僮孺
罔不守其約而歸於謙靖謹飭初公昆季三人並起
高科季弟中丞先卒仲氏憲使公亦未老乞休德義
相淑怡怡如也方屬疾乃自作誌繼以二絕皆正家
之語疾亟舉手正巾而卒曾祖諱寧祖諱鐸縣訓
導父栗翁諱用俊由鄉舉歷任國子助教祖及父俱
以公貴贈通議大夫南京吏部右侍郎妣皆淑人元
配曾氏繼配李氏贈封皆淑人子三人長琰引禮舍

人次瑒馬湖知府孫男七人僭份企佾位似曾孫
男一人將以某年月日葬公於邑桃岡之原子瑒銜
哀屬辭刻諸隧首之碑嵩昔繫籍諸生嗣在詞垣曲
承獎挹顧茲無似有忝誨言爰述蕪詞以列休美而
著其所以爲學者特詳焉亦以見公之志也銘曰
維聖有學一理萬殊明誠兩進斯壹其趨世則多岐
所尚滋異欣妄嗜新其說孔熾不有碩哲孰閑斯漬
翼翼大宰夙志斯道深造敏求繇壯至老不踐宰政
卒隱其身名振當世行高古人困知有記昭我塗軌
折衷群言析入毫縷大耋年踰踐脩不已公雖退佚

物望愈崇公旣逝矣 皇眷愈隆昔也存問光動宸
綸今也卹哀澤濡泉扈進則伊臯退則關洛衛道立
言以惠來學典刑日遠梁木斯摧勒此信辭萬禩無
隳

明故資政大夫戶部尚書兼翰林院學士贈太
子太保謚文敏李公神道碑

嘉靖甲辰七月一日戶部尚書兼翰林院學士蒲汀
先生李公卒于都城之里第享年六十四其年 月

日葬于城東樓子庄之原其癸也詔工曹營兆禮
卿諭祭宮保有加贈之官文敏有易名之謚可謂榮

哀備至也已維李氏之先山東濮州人高祖諱義洪武中以人材徵辭不願仕充錦衣衛校尉義生俊俊生賢相繼補衛役占籍京師行高名辱至公之考杏岡先生諱璚舉弘治丙辰進士仕至資政大夫戶部尚書遂以大其門厥考若祖贈皆如其官公諱廷相字夢弼其始襲世德之懿浚之淵洪以博其慶承家學之芳殖之茂實以暢其華踰冠遂舉弘治辛酉鄉薦明年入對大廷賜進士及第第三人入翰林爲編脩當是時以妙齡魁上第地望高華詞采駿發若虎鳳躍而鸞鶩耀齊輩讓其先登章縫歆其世美然公

負直不阿致忤權宦有兵曹郎中之改逆豎旣殲舊
物旋復於是翱翔禁庭揚厲詞苑經帷勸講則善道
日陳史局編摩則閑詞獨擅文闡校閱則品藻稱當
由春坊中允進侍講學士休聲載起顯位伊始於是
有南銓少宰之擢丁尚書公憂繼丁母憂服闋簡貳
夏卿旋改春部遂正拜司徒督儲于太倉視農于西
苑公本侍從儒臣未經民務然所試輒效若老於吏
事者於是仍兼學士加太子賓客有入視部篆之拜
公經營國計料理邊儲殫竭心力舊病間作抗章乞
休於是有碧山之棲其所隱處鑿山架亭花木森秀

峯壑遶軒泉石在戶公酷嗜法書名畫日娛其中以
肆繙閱杜門却掃導晦辭榮然臺諫有連䟽之薦絲
綸有光起之命時方引領商鼎調梅巨川作楫詎意
其萎入夢不愁與誅縉紳之士咸悼歎焉公自史館
至學士凡分校禮闈者三主應天試者一主禮闈試
者一中以病在告者六載連居二艱暨乞休家居復
五載故論者不能不以未究其用爲憾然以公之材
襮被夏曹則暢理甲兵之務綰符民部則優通錢穀
之方遇事亦解才猷練達不獨以淵學英藝見稱而
已至其衡量所收知名實望之士列朝著布藩維者

相望則其功之所及於邦國烝民益不可泯也公亦
奚憾哉公前配侶氏繼夏氏劉氏贈封皆夫人有子
曰重恩先卒次孝元廕補國子生聘衍聖孔公聞韶
女俱劉出女三長適都御史張檉子文進次未字次
許聘尚書鄭近菴子珠惟昔乙丑歲公分校禮闈予
時在諸生後翰林有遊從之雅禮曹有寮案之誼孝
元以神道之文爲屬嗚呼可無辭乎銘曰

尚書六卿率屬分治司徒地官以掌邦計衆選於才
軼登大吏能陟惟艱矧乃相繼悠悠李祖積行純異
以材見徵寧後弗試暨于聞孫寔大而肆再世崇階

先後是似詩詠緇衣周鄭之世荷嗟李公歎美攸嗣
公起文儒振藻奮藝乃飭兵戎乃理民事遊刃恢恢
綽有餘地晚釋轡馬從心所嗜逸步斯淹長川永逝
帝命有隆褒卹旅至城東之塋壤樹以制豐碑我
義螭首雙峙述行紀詞用詔來禩

明故通議大夫詹事府詹事兼翰林院學士贈
禮部右侍郎謚文裕陸公神道碑

儼山先生陸公既卒且葬其子楫屬下書諸隧首之
碑於是楫裒公遺文刻之曰賦詩歌行樂府曰表疏
頌贊議辯銘解記序雜文碑誌表狀凡一百卷又所

著述曰詩微曰書輯曰道南三書曰河汾燕閒錄曰
史通會要曰蜀都雜抄曰平湖錄曰詩準予得徧讀
之曰富哉文也然而辭博宏偉馳騁恣肆若泉涌而
山出其紀載時事沉鬱雋永若匪炙纔而有餘味其
詩清拔俊逸若芙蓉之濯朝露而丰茸豔彩奪目可
謂虎踞詞林鸞翥文囿者矣公始發解南畿舉進士
入翰林文章名即軒然重天下是時孝皇御極朝
廷清明百官各安其職得以其餘肆力於簡冊翰墨
之間諸司各屬徃徃名雋崛起而與館閣之士爭衡
而並馳公於時翹然特出揚英振華每篇章一出人

爭傳誦之蓋公於書無所不讀挾隱而鉤其玄與李
空同徐迪功諸子上下其議論至於字學妙逼鍾王
比於趙松雪公每臨書日數百字過同舍見繇几輒
縱筆塗寫勞若無人旣本於天質之高邁又輔以學
力之勤篤得於朋友之切劘故其問學之宏博書法
之精絕皆有所自世之士束書不觀獨學寡聞欲望
公之堂與其可得耶公磊落瑰奇嬉笑成文有蘇長
公之風其品隲古今商確事理賞析文義辯識書畫
古器談鋒灑然一座盡傾天下之士聞其名而慕往
揖其貌聽其論而驚以伏也公自翰林編修陞國子

司業丁父憂家居數年以延臣薦起入備講讀遂陞
祭酒一日經筵進講內閣閣公講章輒加竄易公講
畢面奏云今日講章非臣原撰乞自今容講臣得盡
其愚 上雖可之而經筵面奏非故事公出上疏謝
罪 上覆批答以講章內閣閣看係舊規不必更改
果有所見當別具聞公感激條奏有關聖學事凡千
餘言上之當路益忌之疏下吏部左遷延平府同知
蓋公奇節高行不苟同於衆類如此陞山西副使提
學陽曲生員父爲知縣笞死訴于御史趙反抵生罪
公曰父死非辜人子不共戴天奈何罪之與力辯不

合即上疏勅趙亦勅公已而科道官勘實趙謫外
任公得復職補浙江副使仍理學政陞江西叅政陞
西右布政未履任轉四川左布政公自翰林出歷
藩臬即刑名錢穀甲兵之事若素習然在江西決淹
獄數十民德之蜀威茂諸夷作亂朝廷命將進勅公
移文總兵何卿凡數千言洞悉夷情曲中事機當事
者多采用其議復悉力調度兵食未幾夷患悉平召
爲光祿卿內閣疏薦領修玉牒改太常卿兼侍讀學
士扈駕幸承天給行在印御筆署公銜去侍讀二字
改行在翰林院學士陞詹事府詹事宗廟災詔百

官修省於是公䟽乞休詞極懇切乃得旨致仕云
呼始公入翰林以文學名繼出補外則優政事晚歲
召還旣升華選曾幾何時乞身以退所謂討論潤色
之才彌綸經濟之用皆未之究豈不重可惜哉公諱
深字子淵姓陸氏學者稱爲儼山先生其先華亭人
曾祖曰德衡始遷居上海之洋涇祖諱璿考諱平俱
贈如公官前母瞿氏母吳氏俱贈淑人公生成化丁
酉八月十日其卒嘉靖甲辰七月二十五日也享年
六十有八配梅氏封淑人子男一即楫蔭補國子生
好學而文得公家法女一適貴州布政司副理問瞿

學召公卒之明年葬于上海黃浦之原朝廷遣官營
葬賜祭及贈官易名卹典責臨其司無憾也已嘗憶
在弘治壬戌春會試識公於滄衛之間傾蓋如平生
是歲並下第歸歸則約次年必偕來已而果如約同
寓邸同舉進士自是出必聯騎居必連榻公才氣備
一世顧以予之不類獨不鄙辱為知己枯羽鏃孺蒙
益為多然追念疇昔同遊之士冠佩如雲文采風流
照映一時今則零謝無幾矣荒鄙之詞何能為役楮
數以書請誼不忍辭則故淚叙之而系以銘以致予
思亦以慰公于地下其辭曰

大江之東環吳淞蘊靈標異秀所鍾寔生哲人爲時
宗崛起一代稱文雄弱齡獻賦明光宮雲夢七澤蟠
心胸揮毫落紙輝晴虹厥聲四溢何颯颯文章有道
用乃弘屬詞紀事氣以充美哉東序列大鏞爰振文
鐸鳴西靡倏然跼翼下鰲峯武夷雲谷留其蹤五臺
三晉馳行驄岷峨萬疊觀芙蓉晚歸西掖慶遭逢
屬車南狩載橐從玉堂視篆承恩隆遄歸三逕哦菊
松浩然雅志猶冥鴻大星夕隕邁閔凶天下學士皆
哀恫公神洋洋升大空或乘麒麟跨虬龍下上寥廓
隨雲風俯視寰世塵濛濛厥名不滅垂無窮

明故資善大夫太子賓客南京兵部尚書贈太

子太保謚文定張公神道碑

嘉靖甲辰十一月七日留都大司馬甬川張公卒于
位訃聞 上悼惜詔賜祭葬如例贈太子太保謚文
定謹按純德不爽曰定蓋美稱焉而得此者鮮矣以
丁未正月六日癸公鄞縣雲龍溪之金文山嗣子子
中來請文以刺諸神道余與公同舉進士同被選入
中秘公年少於余而器度溫粹造詣純篤予邈不能
及也中更多故晚歲方幸同升詎意溘先以沒則予
何可不銘公亦何忍遽銘公也哉公諱邦奇字常甫

系出宋魏國忠獻之後始祖原一淳熙間自臨安徙
槎湖遂世居鄞曾祖諱純祖諱忱考諱時敏鄉人稱
爲洞雲先生予嘗銘其墓祖父俱以公貴累贈太子
賓客吏部左侍郎兼翰林院學士公弱冠舉于鄉即
有重名與同邑聞靜中汪與成余子華相麗澤時稱
四友後皆至顯官公始爲翰林檢討居三載以親老
疏乞便養出補湖廣按察副使督學政公重行誼精
鑒別風教大著旣又以親久居楚思鄞謀乞解職予
使廣西與公遇於衡嶽之下留處十日其後公遂歸
鄞是時公杜門却掃娛親著書有終焉之志矣廼益

務覃究性命之學所著大學中庸五經諸說學者傳之嘉靖改元用席文僖薦復起爲四川提學至則闢大益書院選髦俊以受其業楚蜀之士出公門多顯者公以親年益老復乞休銓部奏改提學福建便之尋擢左春坊庶子兼翰林侍讀未至陞南京國子祭酒公身示教不設擾楚四方士潏然雲集慶得師焉陞南京吏部右侍郎丁父憂服闋召爲吏部右侍郎轉左即攝部篆抗節持衡雖室近弗撓旣而以本官兼學士掌院事簡充經筵日講纂修玉牒戊戌主考會試所錄多名士已亥冊立皇太子特加太子賓

參掌詹事府事

上南狩承天命攝禮部篆嘗遣奉

先代祀涇藩題主先師釋菜皆被特命恩遇甚隆是時公母太夫人年踰九十公懇疏乞歸上不允溫

旨慰答曰大臣祿養壽母自古治朝則有之時以爲

榮歷侍郎九載進禮部尚書仍掌詹府事然公恒思

將母而南銓部奏遷公南京吏部尚書尋改南京兵

部叅替機務公至簡上伍飭法禁威讐惠浹兵民肅

然居數月竟以疾逝距生成化甲辰五月得年六十

有一元配王氏繼陸氏贈封皆淑人子男六子中出

爲伯兄後而以公蔭授中府都事次子釋國子生次

子觀子恩子楨子昭女三余九章陸滄萬來章其壻也公天性純孝事親至老彌篤初仕時伯兄自家來視得疾道亡公感痛終其身事嫂如母與人交和平長厚未嘗與物忤以故人皆敬樂之爲文章根切理要豐蔚典則所著有觀光紆玉養心環碧等集若干卷行世讀其書常有識其所作者云論者曰乙丑之試得士爲多若公尤卓偉不羣者也然柄用方隆而奄忽徂終俾朝失良臣士庶含範凡百君子固不爽然悲焉銘曰

士所自力在行與文本實旣端斯綱於閭鄞有遺

純稟天至惟古是師卓有立志踐揚中外翰苑儒林
遂陟成均育俊達材惟聖簡知荐膺寵秩慎密溫
恭實時正直詩詠孝德如珪如璋允也吉士邦家之
光雲龍之原谿谷盤鬱永安其藏過者爲式

光祿大夫太子太保吏部尚書贈少保謚文襄

唐公神道碑

今制大臣於歿既得請祭葬矣其易名以謚則稽德
視功出宸斷不輕畀也凡館閣侍從之賢廼得謚
文部院諸曹間有得此者自祖宗朝迄今不數臣
焉若吏部尚書唐公其一也公少從學楓山章文懿

公之門得其淵源學優行績為文章謹嚴典重有左
氏先秦之風精詣閎肆號稱作者敷歷中外隨試輒
効聲望偉然而西師俘馘之功為多 上賜謚曰文
襄君子謂公足以當之無忤云先是公任冢宰遽疾
乞休弗許固請忤 上意詔削官以歸公昇出都門
二十里逆旅舍中亡矣後四年其仲子汝楫舉進士
第一授翰林修撰始具疏叩閣述公前疾及道卒之
狀以明不欺 上復公官加贈少保遣祭營塋徽典
駢及存歿湮鬱一旦伸雪時論快焉汝楫則詣予泣
請文以作公碑公諱龍字虞佐浙蘭谿人也曾祖麟

仕新祖諱賢思州推官考諱以公貴贈光祿大夫太子太保兵部尚書妣皆一品夫人公正德戊辰進士釋褐知郟城縣郟單散流賊且至公集壯丁守無敢睨城第掠境上去公追殺數十人賊怒復還公督戰又斃其驍勇數人以有功旌稱能令召擢內臺風裁峻整按滇南數上封事諫巡遊斥嬖倖率人所難言言之剴切按江西逆濠之變甫平禁兵在境為患公禁不得逞疏請班師民獲安堵守正助逆之人明析功罪無遺慝無枉良又人所難處處之克當稱名御史督學於關中也校文貴雅正品士先器識稱

知人掌憲於三晉也義感囚徒明燭誣獄稱名執法
以太僕卿徵尋擢僉都御史總漕運既又以副都御
史召入臺又擢吏部侍郎會關中告饑西陲多警

上知公可屬以大事也拜兵部尚書兼右都御史總
督三邊軍務公馳赴賑卹病者興流者復一時將佐
推誠置腹咸樂為用乃閱兵三萬出塞直指陰山軍
容震耀虜驚遠遁自是犯寧夏則有柳門之捷犯延
綏則有清水之捷吉囊自將十萬犯安會則有興武
有乾溝之連捷一呼而將士群附二旬而露布三騰
前後奏記為俘獲為首級幾數百奪夷器無算兵部

上其功有爵封武廕之請不報 召還為刑部尚書
劉源清以討亂卒過嚴劉淑相以奏訐執政皆坐重
典公論救得末減執憲持法權勢庇援無所避 九
廟成覃恩宥大禮六獄諸臣得放歸者二十餘人公
有力焉而公以母太夫人鄭年八十餘懇乞終養
上賜給驛歸朝野榮之然臺諫僉謂公當及時柄用
不宜聽其自便薦章交上 上亦思公起為南京刑
部尚書尋改南京吏部未行改兵部尚書趣令赴任
公感激奉太夫人以行至則謂制敵在任將請待邊
吏文法少寬故諸宿將逮繫廢黜者皆得錄用加大

子太保冢宰員缺輿論屬公公既受命一以以人事
若為任甄才望崇恬退拔滯幽錄廢棄疏舉四十餘
人無何天不憖遺哲人云萎識與不識咸借借焉所
者有易大旨歷官奏議漁石集行于世公卒以嘉靖
丙午七月十九日距生成化丁酉享年七十配徐繼
劉先公卒贈封皆一品夫人子男七汝器國子生次
即汝楫次汝舟舉人次汝梅汝渭汝淮皆邑學生女
一適國子生朱朝尹孫男十二人女三人外子為編
修公為侍御史獲往還以文字相益德義相友予適
公邑必登堂拜母交好垂四十年予亦不可作矣

能無悲乎公懿行不能悉著其大者以示後而公
母太夫人友見汝楫登第年九十五而終亦以汝楫
疏請得蒙卹典榮哀備至足以慰公於冥漠矣汝
楫乞假歸葬公于近郭觀山祖塋之次從公志也銘
曰

有偉唐公時鮮克儔保乂王室文武具優如堂隆棟
如川巨舟發為文詞商鼎夏卣如彼武庫而森戈矛
作時宗工媲美前修釐政汙事剗決靡留張弛咸宜
不競不綈施以治軍條策畫籌決勝罇俎褫魄旃裘
功弗及賞歸怡林丘國倚老成維舊是求入正銓衡

倭人甄收碩人云亡邦家之憂帝念往勸無德不
酬錫贈易名寵數疊稠豐碑琢詞言樹道周以揚其
休以告諸幽

鈴山堂集卷第三十五終